



Fasnacht 2008

KNOCHESTAMPFER WAGGIS

sit 1972

## Basel schmegggt speziell... ...dr «Soap Flop» uf Telebasel.

Fallt der emool e Bleedsinn y  
ziehsch en in d'Lengi und scho gly  
gitts uss däm Bleedsinn e Serie ...  
E «Soap» duet me das denne nenne  
und findsch e Dumme wo der denne  
ohni gross dr Inhalt z'kenne  
au no grad dr Stutz duet brenne  
bruuchsch technisch nur no en Antenne  
und e baar mediegaili Senne  
wo sunscht sowieso nur penne  
und froh si mien fyr jedes Gfasel  
hesch richtig tippt, dasch Telebasel!  
Dä Kanaal – sunscht scho-ne Qual  
s'gaischtig Niveau ehnder schmaal  
findet s'Ganzi kolossal  
vergässen isch grad s'Kaffi Bâle  
me präsentiert dä neyschti Kitsch  
wie Lüthi und Blanc – uf Baseldytsch  
En arbetslose Swissair Pilot  
wo als Källner schafft, wills em bschisse goot  
drift im Milieu wo jede dr ander verstoot  
uf aini vom Daig in synere Not  
Spiile duets – an dr Wält ihrem Nabel  
dasch zwysche der Dalben und em Schnabel  
und s'Ganzi stellt me, sig's wie's well  
under s'Motto **«Basel schmegggt speziell ...»**  
aber kuum waisch richtig, was es sell  
nach nur fimf Folge – finanziell  
verleschts im Regisseur dr Stumpe  
dr Ospel syg schynts am Verlumpe  
und will au nyt mee yynepumpe  
s'git nyt mee z'luege, nyt mee z'loose  
die Saifibloose isch in d'Hoose  
speziell schmeggts nimm – s'duet nur no stingge  
und s'glopfen alli ihri Fingge ...  
Was soll's, wenn's au nimm wytergoot  
fyr wyteri Folge isch's nie z'spoot  
und dr Titel isch no lang nit dood  
kasch jo bigoscht no vyyl entdegge  
wo **z'Basel speziell** duet **schmegge**  
in **Basel schmegggt d'Kultur speziell**  
in Ziri nummen punktuell ...  
in Thun schmeggts zymmlich sexuell  
und das y das au no verzell:  
im Elsass gitts jo eventuell  
wenn's so wyter goot, so kriminell  
als allerletschti Färnseeshow  
... e Fessehaimer Supergau!  
Die näggschti Folg spiilt, s'wär no glatt  
by den Immobilie Basel-Stadt  
wo me-n-allne zaigt, wie sich's kennt loone  
s'aige Vermeege e weeneli z'schoone  
s'Baudepp hindeduure z'floone  
und als Staatsaagschtellte fascht gratis z'woone  
E baar Serie lang, s'isch fyyn  
zaigt s'Färnsee die Pfadfinder do vo Pfyyn  
die kemmen-aim vor, de wursch grad stierig  
wie dr rot-grien Dail vo dr Basler Regierig  
**Basel schmegggt speziell** au by dr Bahn  
zmitts under der Stadt, es isch dr Wahn  
gitts die erschti U-Bahn, do veregg-y  
wo ai Zug grad so lang isch wie die ganz Streggi...  
**Schmeggt Basel speziell**, hett me-n-immer vyyl z'brichte  
und druss gitts denn ändloosi Fortsetzigsgschichte:  
Wenn kunnt die näggscht Panne by de Combino?  
Wo hetts no Blatz fyr die näggschte zää Kino?  
Wäm basst wenn weeles neyi Stadtcasino?  
Wieso muess sich d'Mäss so nach oobe stregge  
und ys d'Ussicht zue de Schwoobe verdegge?  
Und wird emänd us dr Geothermie  
mit dr Zyt no-ne-n-Aerdbeebe-Aendloos-Serie?  
Ayale Aendloos, Gerig und Dauerhopper

Au als Aendloos- Serie und «Dauerbrenner»  
isch d Barbara Schneider dr absolut Renner  
was by dääre schief lauft, hett scho lengscht Methode  
und längti fyr hundert Episoode ...

**Speziell schmeggts** au bym Hanspi Gass  
dä macht sich niene so richtig nass  
in dr neyschte Soap derfsch en nit verbasse  
als Hansdampf Gass in alle Gasse ...

Und dr Morin, unsre griene Babbi  
seet sich scho in dr Rolle als Super-Stapi  
y froog mi, muess das Basel ha?  
– also ych säächt dä eher als Fäärimaa ...

**Speziell schmeggt z'Basel** au die neyschti Serie  
wie-n-e abvereggd Synfonie  
denn wird d'OeKK zur Sympany  
no isch's mit Sympathie verby  
Immer **speziell schmeggt z'Basel** s'Theater  
au bym Delnon blybt ys dr glyychi Kater  
ai Tradition wird wyttergfiehart  
s'wird uff dr Bihni ungeniert  
ai- bis zwaimool pro Saison onaniert.

**Basel schmeggt au speziell** – bym Schuelsystem  
do **schmeggts** immer nach **spezielle** Brobleem  
aber IQ hi und IQ här

trotz PISA-Rüggstand fällt d'Vorstellig schwär  
unsri Schieler wäre – es macht ys mied  
kompatibel mit dääne vom Baselbiet ...

Sicher **speziell** – by Daag und Nacht  
**schmeggt Basel** während dr Euro 08

Die greeschti Froog isch fyr ganz e Huffe  
ob'd us aim oder mehrere Bächer muesch suffice  
Speziell sinn au s'Public Viewing and Drinking  
s'kunnt zum Public Shipping und nochhär Stinking  
will d'nämmlig, und das hett e jede begriffe  
by zwai Stutz pro Sprutz sicher duss gosch go schiffe  
By dr letschte Serie simmer sälber derby  
als Knochestampfer in Eige-Regie

wenn **Basel** no **spezieller** duet **schmegge**  
kasch ys aimool im Joor bsunders aggtiv entdegge  
mer leen ys am Morgen am vieri wegge  
und denn goots drey Dääg loos an allnen Egge  
und alles, wo-n-ys sunscht nit so duet schmegge  
geen mer under d'Waggislarve go verstegge ...!

---

D Ladäärne-Uusstellig uff em Minschterplatz und  
d Waage- und Reggwisyte-Uusstellig bi dr Kasäärne  
sin vom Määntig znacht bis am Mittwuch demoorge!  
Deert und an de 3 Verkaufsständ (CINS) in dr Stadt ka  
men au alli Zeedel und Schnitzelbängg, d Blaggedde  
und dr Rädäbäng kaufe.